

**Zastupnik u Skupštini Kantona Sarajevo,
Jasmin Šaljić**

**Vlada Kantona Sarajevo
Ministarstvo unutrašnjih poslova Kantona Sarajevo**

Predmet: Zastupničko pitanje

Zastupničko pitanje vezano za dostavu statističkih podataka za proteklih 10 godina o broju dojava o postavljenim bombama, broju rasvjetljenih slučajeva i broju slučajeva u procesu.

Ponovno je započeo talas dojava o bombama u školama situacija u kojoj nažalost svjedočimo već godinama. Ovakve dojave ozbiljno uznemiravaju djecu, roditelje i školsko osoblje, te narušavaju svakodnevni život porodica.

Dešava se da u jednom danu, za istu školu stignu dvije dojave (primjer OŠ Meša Selimović). Posljedice nisu ni malo bezazlene, djeca i roditelji se izlažu stresu, nastava se prekida, roditelji napuštaju radna mjesta kako bi preuzeli djecu, a policijski službenici angažuju značajne resurse za preglede. Sve to ima dodatne finansijske implikacije. Uprkos tome, ne vidimo dovoljan broj konkretnih i sistemskih mjera. Izostaju preventivne aktivnosti, a javnost nema uvid u ključne informacije – poput toga ko su počinitelji djeca ili odrasli?

Koliko je slučajeva rasvijetljeno i koliko sankcija je izrečeno!?

Bez adekvatnih statističkih podataka teško je planirati adekvatne mjere i eventualno povisivanje kaznene politike, ovim putem upućujem zastupničko pitanje sa zahtjevom da premijer u ostavci Nihad Uk ili ministar Katica javnosti predoče i dostave: statističke podatke za proteklih 10 godina, broj dojava, broj rasvjetljenih slučajeva, broj slučajeva u procesu, informacije o izrečenim sankcijama, pregled dosadašnjih mjera koje su poduzete, kao i planirane aktivnosti za prevenciju i smanjenje ovih pojava.

Smatram da ova problematika zahtjeva ozbiljan i sistematski pristup jer svaka dojava iziskuje stres, uznemiravanje javnosti, trošak, angažman policije kroz operativne provjere i pregled KDZ-a, potom dodatni angažman nastavnika i na stotine članova porodica djece u školi. Učestala pojava dojavljivanja bez odgovora od strane Vlade i MUP KS i komuniciranja u ovakvim situacijama sa građanima stvara percepciju u javnosti da dojavljivači prolaze nekažnjeno, da vlasti nisu u stanju da pronađu počinioca, te da se može beskonačno prekidati nastava i uznemiravati građani KS. Najbolja prevencija je objava o uhapšenim i procesuiranim osobama u prethodnom periodu. Počinioci moraju znati da neće proći nekažnjeno! Moraju znati da prave ogromnu štetu državi i da će snositi odgovornost.